



15. juuni 2024

UKA2024/imm. 79

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Imigassamut katsorsaasutut aalajangersimasumik ilinniagaqarsimanissamik inatsisitigut piumasqaataasut saniatigut allatut ilusilimmik katsorsaasutut ilinniagallit pisortanit, imigassamut pinngitsuuisinnaajunnaarnermik katsorsaarnermi tapiliussatut, atorluarneqarnerulernissaannik periarfissiuunneqarnissaat anguniarlugu, Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartuni ilaasorta q Doris Jakobsen Jensen, Siumut)

#### **Tungavilersuut:**

Allorfik pilersinneqarmat siunertaasimanngisaannarpoq, Minnesota tungavigalugu katsorsaasutut katsorsaasutulluunniit allatut ilinniarsimasut nunatsinni atorneqarsinnaanerinnik mattunneqarnissaat.

Pissutsit piviusut imaapput, Minnesota tungavigalugu katsorsaarnermik ilinniarsimasut aammalu katsorsaasutut allatut ilinniarsimasut pisortat katsorsaaviini atorumaneqanngimmata. Ilinniarsimasut taakkua ullumikkut allani sulingikkunik suliffissaaleqisuupput. Nunatsinni aangajaarniutinik aammalu aningaasanoornermik atornerluineq taama annertutigittillugu, katsorsaasut ilaannik atuiumanginnerput inissaminiingilaq.

Inuit tamatta assigiinngitsuuvugut, imaassinnaavoq ilaasa allatut katsorsartinneq iluaqutiginerugaat, immaqalu ilaasa Minnesota tungavigalugu katsorsartinneq iluaqutiginerugaat imaluunniit katsorsaariaatsit allat, taamaattumik assigiinngitsuunik toqqagassaqaarsinnaaneq immiini pitsaasuvoq.

Ukiut siuliini arnaq inuusuttunguaq kalaaleqaterput akilinermiik nunatsinnut tikippoq, naggueqatitta akornanni katsorsaasutut sulisimalluni, taamaakkaluartoq nunatsinnut uterami piginnaasai atorumaneqanngillat kultoori tungavigalugu katsorsaarnermik ilisimasalik.

Nassuerutigisariaqarparput ulorianartorujussuarmut killiffeqaratta, nunatsinnut rockerit tikittalernikuupput, kokain allallu aangajaarniutit ulorianartorujussuit atugaalernikuupput, tamakkua aqussinnaanngikkaluarutsigilluunniit ajornartorsiutip akiornissaa ammasumik oqaluuserisariaqarparput.



Politikkikkummi siunertaavoq, katsorsaariaatsit assigiinngitsut periarfissaassasut. Tamannalu piviusunngortissagutsigu nukiit piumassusillit ilisimasallillu tamaasa atorluartariaqarpagut, tassami katsorsarneqarnissamik pisariaqartitsisut nunatsinni amerlasoorujussuummata.

Qulaani tunngavilersuutigisakka tunngavigalugit, siunnersuutigaara, katsorsaanermik ilinniagaqarsimasut kikkulluunniit pisortat katsorsaanermik suliffeqarfiutaanni sulilernissaannut inissaqartinneqassasut kivitseqataanissaallu aqutissiuunneqassasoq. Taamatut siunnersuuteqarpunga, ajattuitigaluta ajornartorsiuterpassuit qaangersinnaannginnatsigit nukiillu pisariaqartitagut atorluartariaqaratsigit.

**Pisortanut aningaasatigut allaffissornikkullu kingunerisassai:**

Naatsorsuutigineqarpoq ukiup ataatsip ingerlanerani, AC-fuldmægtig-ip akissarsiaasa kr. 500.000,- iusut naliginut, suliaq suliarineqarsinnaassasoq.

**Namminersortunut aningaasaatigut allaffissornikkullu kingunerisassai:**

Suliap ingerlanneqarnerani namminersortunut aningaasatigut kinguneqassanngilaq.

**Innuttaasunut aningaasatigut allaffissornikkullu kingunerisassai:**

Suliap ingerlanneqarnerani innuttaasunut aningaasatigut kinguneqassanngilaq.